

განმარტებითი ბარათი
საქართველოს კანონის პროექტზე „კულტურის შესახებ“ საქართველოს კანონში ცვლილების შეტანის თაობაზე

ა) ზოგადი ინფორმაცია კანონპროექტის შესახებ

ა.ა) კანონპროექტის მიღების მიზეზი:

ა.ა.ა) პრობლემა, რომლის გადაჭრასაც მიზნად ისახავს კანონპროექტი:

2014 წლის 5 თებერვალს საქართველოს პარლამენტის მიერ მიღებულ იქნა საქართველოს ორგანული კანონი „ადგილობრივი თვითმმართველობის კოდექსი“ (შემდგომში - კოდექსი). კოდექსის 165-ე მუხლის მე-2 პუნქტის შესაბამისად, საქართველოს მთავრობამ უნდა უზრუნველყოს სახელმწიფო და მუნიციპალიტეტის უფლებამოსილებათა სრულად გამიჯვნისათვის შესაბამისი საკანონმდებლო ცვლილებების მომზადება, აგრეთვე, საჭიროების შემთხვევაში, მუნიციპალიტეტისთვის უფლებამოსილებათა დელეგირების მიზნით, შესაბამისი სფეროების განსაზღვრა და საქართველოს პარლამენტისთვის საკანონმდებლო აქტების პროექტების წარდგენა.

შესაბამისად, კანონპროექტი მიზნად ისახავს „კულტურის შესახებ“ საქართველოს კანონის კოდექსთან შესაბამისობაში მოყვანას. კერძოდ, კანონპროექტით შეიცვლება საქართველოს ტერიტორიაზე „მონუმენტური სახვითი ხელოვნების ძეგლის (ქანდაკება)“ განთავსების თაობაზე გადაწყვეტილების მიღების წესი და სავალდებულო აღარ იქნება მუნიციპალიტეტის ორგანოს მიერ მიღებული გადაწყვეტილების საქართველოს განათლების, მეცნიერების, კულტურისა და სპორტის სამინისტროსთან შეთანხმება.

განათლების, მეცნიერების, კულტურისა და სპორტის სამინისტროსთან კონსულტაციის საფუძველზე გაირკვა, რომ არსებულ რეგულაციას პრაქტიკაში ნომინალური დატვირთვა ჰქონდა. აღნიშნული ცვლილება ხელს შეუწყობს დეცენტრალიზაციის პროცესს და მუნიციპალიტეტების უფლებამოსილების გაზრდას კულტურის სფეროში გადაწყვეტილებების მიღებისას. აღნიშნული საკანონმდებლო ცვლილება ასახულია საქართველოს პარლამენტის განათლების, მეცნიერებისა და კულტურის კომიტეტის 2019 წლის სამოქმედო გეგმაში.

„კულტურის შესახებ“ საქართველოს კანონის მე-19 მუხლის პირველი პუნქტის „ზ“ ქვეპუნქტის თანახმად, ადგილობრივი თვითმმართველობის ორგანოთა კომპეტენციას განეკუთვნება „მონუმენტური სახვითი ხელოვნების ძეგლის (ქანდაკების) განთავსების თაობაზე გადაწყვეტილების მიღება“. კანონის ამ ნორმის საფუძველზე მუნიციპალიტეტების ორგანოებმა მიიღეს შესაბამისი ნორმატიული აქტები (მაგ. 2015 წლის 8 მაისს, ქ. თბილისის მუნიციპალიტეტის საკრებულომ მიიღო №11-42 დადგენილება „ქ. თბილისის მუნიციპალიტეტის ტერიტორიაზე მონუმენტური სახვითი ხელოვნების ძეგლის (ქანდაკების), ობელისკის, მემორიალური დაფისა და სხვა მემორიალური ობიექტის განთავსების წესის დამტკიცების თაობაზე“).

მუნიციპალიტეტების ორგანოების მიერ ზემოთაღნიშნული ნორმატიული აქტების პრაქტიკაში დანერგვამ გამოავლინა თანამედროვე კონცეპტუალური ხელოვნების ტენდენციების შესაბამისად, ცნების „მონუმენტური სახვითი ხელოვნების ძეგლი (ქანდაკება)“ გაფართოების აუცილებლობა. შესაბამისად, დღის წესრიგში დადგა „კულტურის შესახებ“ საქართველოს კანონის მე-19 მუხლში ტერმინის „მონუმენტური სახვითი ხელოვნების ძეგლი (ქანდაკება)“ - „არქიტექტურულ - მხატვრული კომპოზიცია“ ტერმინით ჩანაცვლების მიზანშეწონილობა. „არქიტექტურულ - მხატვრული კომპოზიცია“ გულისხმობს სხვადასხვა მასალისგან დამზადებულ ხელოვნების ობიექტს, რომელიც მოიცავს სკულპტურას, ძეგლს (ქანდაკება), ობელისკს, ინსტალაციას (კონცეპტუალური ხელოვნების ობიექტს). საკანონმდებლო ინიციატივით დაგეგმილი ტერმინოლოგიური ცვლილება ეფუძნება ქ.

თბილისის მუნიციპალიტეტის საკრებულოს განათლებისა და კულტურის კომისიის წინადადებას (N).

გარდა ზემოთ აღნიშნულისა, კანონში არსებული ტერმინი „ადგილობრივი თვითმმართველობის ორგანოები“, შეიცვლება ტერმინით „მუნიციპალიტეტის ორგანოები“ ვინაიდან, კოდექსის თანახმად, თვითმმართველი ერთეული არის მუნიციპალიტეტი. მუნიციპალიტეტი არის დასახლება რომელსაც აქვს ადმინისტრაციული საზღვრები, და ადმინისტრაციული ცენტრი, გააჩნია არჩევითი წარმომადგენლობითი და აღმასრულებელი ორგანოები. ხოლო, ადგილობრივი თვითმმართველობა კი წარმოადგენს მოქალაქეთა უფლებას მათ მიერ არჩეული მუნიციპალიტეტის ორგანოების მეშვეობით გადაწყვიტონ ადგილობრივი მნიშვნელობის საკითხები. ასევე მიზანშეწონილია კანონის შესაბამის მუხლებში ტერმინი „ადგილობრივი თვითმმართველობის ორგანოები“ ჩანაცვლდეს ტერმინით „მუნიციპალიტეტის ორგანოები“, ხოლო ტერმინი „ადგილობრივი თვითმმართველობის ბიუჯეტი“ შეიცვლება ტერმინით „მუნიციპალიტეტის ბიუჯეტი“.

ა.ბ) კანონპროექტის მოსალოდნელი შედეგი:

კანონპროექტის მიღებამ ხელი უნდა შეუწყოს სახელმწიფო და მუნიციპალიტეტის უფლებამოსილებათა გამიჯვნას და მუნიციპალიტეტის ორგანოების უფლებამოსილებების გაზრდას კულტურის სფეროში გადაწყვეტილებების მიღებისა და მართვის პროცესში. ამასთანავე, ხელოვნების თანამედროვე ტენდენციებთან შესაბამისობაში იცვლება/ფართოვდება მონუმენტური სახვითი ხელოვნების დეფინიცია.

ა.გ) კანონპროექტის ძირითადი არსი:

კანონპროექტის თანახმად ცვლილება შედის კანონის მე-19 მუხლის პირველი პუნქტის „ზ“ ქვეპუნქტში, რომლის მიხედვითაც კულტურის სფეროში ადგილობრივი თვითმმართველობის ორგანოთა კომპეტენციას განეკუთვნება არქიტექტურულ - მხატვრული კომპოზიციის განთავსების თაობაზე გადაწყვეტილების მიღება. რამდენადაც სავალდებულო აღარ იქნება ამ გადაწყვეტილების განათლების, მეცნიერების, კულტურისა და სპორტის სამინისტროსთან შეთანხმება, შესაბამისად მე-19 მუხლის მე-2 პუნქტი ამოღებული იქნება კანონიდან.

ამასთანავე, ტერმინოლოგიური ცვლილებები შედის კანონის მე-19, 22-ე, 24-ე და 29 მუხლებში.

ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):

ასეთი არ არსებობს.

ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში - აღნიშნულის თაობაზე შესაბამისი დასაბუთება:

კანონპროექტის ძალაში შედის გამოქვეყნებისთანავე, რაც ხელს შეუწყობს მუნიციპალიტეტის ორგანოების მიერ კულტურის სფეროს მართვის საკითხებში გაზრდილი უფლებამოსილების დროულ განხორციელებას.

ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):

ინიციატორი არ ითხოვს კანონპროექტის დაჩქარებული წესით განხილვას.

ბ) კანონპროექტის ფინანსური დასაბუთება

ბ.ა) კანონპროექტის მიღებასთან დაკავშირებული აუცილებელი ხარჯების დაფინანსების წყარო:

კანონპროექტის მიღება არ არის დაკავშირებული ბიუჯეტიდან დამატებითი სახსრების გამოყოფასთან.

ბ.ბ) კანონპროექტის გავლენა ბიუჯეტის საშემოსავლო ნაწილზე:

კანონპროექტის მიღება არ იქონიებს გავლენას ბიუჯეტის საშემოსავლო ნაწილზე.

ბ.გ) კანონპროექტის გავლენა ბიუჯეტის ხარჯვით ნაწილზე:

კანონპროექტის მიღება გავლენას არ ახდენს სახელმწიფო და მუნიციპალიტეტების ბიუჯეტის ხარჯვით ნაწილზე.

ბ.დ) სახელმწიფოს ახალი ფინანსური ვალდებულებები:

კანონპროექტის მიღება არ ითვალისწინებს სახელმწიფოს მიერ ახალი ფინანსური ვალდებულებების აღებას.

ბ.ე) კანონპროექტის მოსალოდნელი ფინანსური შედეგები იმ პირობით, რომელთა მიმართ ვრცელდება კანონპროექტის მოქმედება:

კანონპროექტის მიღება არ გამოიწვევს ფინანსურ შედეგს იმ პირობისათვის რომელთა მიმართ ვრცელდება კანონპროექტის მოქმედება.

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის ოდენობა და ოდენობის განსაზღვრის პრინციპი:

კანონპროექტი არ ითვალისწინებს გადასახადს, მოსაკრებელს ან სხვა სახის გადასახდელს.

გ) კანონპროექტის მიმართება საერთაშორისო სამართლებრივ სტანდარტებთან

გ.ა) კანონპროექტის მიმართება ევროკავშირის სამართალთან:

კანონპროექტი არ ეწინააღმდეგება ევროკავშირის სამართალს;

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

კანონპროექტი არ ეწინააღმდეგება საქართველოს მიერ საერთაშორისო ორგანიზაციებში წევრობასთან დაკავშირებით აღებულ ვალდებულებებს.

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან და შეთანხმებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, მისი შესაბამისი მუხლი ან/და ნაწილი:

კანონპროექტი არ ეწინააღმდეგება საქართველოს ორმხრივ და მრავალმხრივ ხელშეკრულებებს.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირისა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთან დადებული საქართველოს სხვა ორმხრივი და მრავალმხრივი ხელშეკრულებებიდან:

ასეთი არ არსებობს.

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომელმაც მონაწილეობა მიიღო კანონპროექტის შემუშავებაში, ასეთის არსებობის შემთხვევაში:

აღნიშნული კანონპროექტი ეფუძნება საქართველოს განათლების, მეცნიერების, კულტურისა და სპორტის სამინისტროსთან კონსულტაციებს და ქალაქ თბილისის მუნიციპალიტეტის საკრებულოს განათლებისა და კულტურის კომისიის მომართვას.

დ.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში:
ასეთი არ არსებობს.

დ.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში:
ასეთი არ არსებობს.

ე) კანონპროექტის ავტორი:
პარლამენტის წევრები: მარიამ ჯაში, შოთა ხაბარელი, სვეტლანა კუდბა, გურამ მაჭარაშვილი.

ვ) კანონპროექტის ინიციატორი:
პარლამენტის წევრები: მარიამ ჯაში, შოთა ხაბარელი, სვეტლანა კუდბა, გურამ მაჭარაშვილი.